

杭州府志
(乾隆)

二五

杭州府志卷一百二十八

人物一 武功二

明

許懋字國器海甯人生而不凡識度豁如元季歲歉發家儲賑貸復以萬戶長督海運抵大都授杭州路治中不就時紅巾賊起懋倡子弟義勇戰卻之復授前職終不受太祖下詔求賢懋被薦以賢良起家吳丙午年授承事郎同知海州在官六載累著循績

萬
瑟

志海甯
縣志

陸原俊新城人少以勇略爲衆所推元末與姪慶甫團練民兵保障鄉里張士誠將李伯昇攻新城復遣他將據三谿原俊慶甫駐

軍新城練頭橫截賊兵會李文忠朱亮祖兵至賊遂敗去太祖嘉其功同授義兵千戶原俊復以功擢總兵萬戶署河南睢州知州

卒

新城縣志

孫鼎字景鉉餘杭人洪武十五年貢入中都國子監二十九年除都察院照磨永樂中歷官陝西按察司副使督兵邊郡累立戰功尋卒於官建祠其地其長子以父功襲四川土司世世不絕次子

還家餘杭

康熙志

岑斌錢塘人洪武間征雲南有功升姚安千戶十七年開設千戶

所公署其所營繕尤得士卒心及卒無不痛悼爲之立祠

雲南通志

周文字顯謨富陽人永樂二十一年舉人授福建武平教諭造就

人才名流多出其門考滿擢河南道監察御史巡撫廣東正統間中官王振用事文抗疏論之學士倪謙以憂制留用文固請容謙終制識者重其敢言十四年鎮遠播州苗俱作亂頗猖獗朝議命文督兵偕王驥往勦至則單車詣賊宣諭國威賊果歸欵卽命巡按貴州景泰二年巡撫廣東會殘寇復叛文親督軍平之請以其地建順德縣設官分治民賴以安未幾以艱歸卒於家

富陽縣志

沈慶字仲會餘杭人學博才瞻尤精兵法宣德元年舉人官翰林院五經博士大學士陳循薦宜大用升湖廣按察司僉事時靖川五開等處苗賊生發把截道路慶相地設官鑿山濬河自偏道鎮直抵黃平迂道千餘里據壕立兵以地利制賊賊李珍蒙能大肆

猖獗慶親率兵突陣殲厥渠魁禽其黨二百餘人升本司副使巡邊整飭兵備成化初復領漢土官兵十萬餘衆進攻臘屋桃林武岡南洞等處一鼓禽獲賊境悉平進階亞中大夫請老歸

餘杭縣志

鄭容字士昂錢塘人宣德四年舉人授江西樂安縣教諭邑無賴曾子良輩嘯聚大槩山容率民兵出戰賊潰邑賴以甯擢監察御史升雲南按察司副使正統八年麓川思機發不靖靖遠伯王驥薦容參贊總兵征南將軍沐昂軍務苗賊攻圍貴州地方告急容曰脣亡則齒寒卽與昂調兵策應賊聞之宵遁烏撤畢節赤水永甯站路營堡被賊燒燬遣指揮使楊濬率軍整葺之騰衝與麓川接壤添設衛所容區畫布置立營以居分田以耕立市井有無相

易保障益固升大理寺少卿督運糧餉升右僉都御史參贊如舊
練達嚴肅政教大行思機發竄伏緬甸朝廷欲發兵征捕容奏遣
都指揮管官往諭之緬甸卽出思機發母子妻女械送京師升左
僉都御史尋降調福建按察司副使

江通志雲南
通志獻徵錄

楊甯字彥謐錢塘人宣德五年進士授刑部主事機警多才能負
時譽正統四年與都督吳亮征麓川賊款軍門約降甯曰兵未加
而先降誘我也宜嚴兵待之不聽令甯督運金齒已而賊果大至
官兵敗績諸將被遣甯升郎中六年復大舉征麓川總督王驥仍
請甯行甯督戰渡江攻上江賊砦矢石雨下奮不顧身督戰益力
士卒咸用命遂克之又進攻杉木籠山賊柵險拒守甯曰賊狃前

勝當多方以誤之使不暇并力乃可圖驥從其言令諸將各視形
便以進諸道俱奮連破七砦斬陶孟翥等餘賊奔潰乘勝擣賊巢
圍之因乘風縱火烟燄漲天賊不知所爲死鋒鏑及墮崖溺水者
不計數師還超拜刑部侍郎九年代侯璉參贊雲南軍務時麓川
甫平甯以騰衝險要築城置衛越四旬有五日而工畢先是麓川
賊首逸於緬甸至是甯以城成民且效順乃簡銳師若將有所向
者先遣使責緬緬人懼求出賊自效卒誅大憝函首以獻居二年
召還京會閩浙廣東盜起師未有功江右密邇三境命甯巡撫甯
至按視郡縣當賊衝者增城垣立排柵以斷要路團集鄉兵訓以
武藝賊有侵軼者輒擊斬之賊聞風畏避不敢犯甯益鎮以簡靜

日討民瘼而弛張之境內嚮服景泰初召拜禮部尙書二年調南

京刑部天順改元致仕卒年五十九

明史本傳兩浙名賢錄雲南通志

鄭暹錢塘人宣德九年舉人正統初任江西贛州通判莅事有聲十三年閩廣盜起暹躬率丁壯萬餘人設法防禦贛幸無虞升湖

廣常德府知府

贛州府志江西通志

彭程字懷遠海甯衛指揮僉事負膽略知天文正統十三年閩中沙縣賊鄧茂七據延平稱剷平王都督劉聚檄程率兵往討鼓行而前明年正月哨延平下營適閩帥招飲程移營不赴帥不悅其夜賊劫程舊營不值驚遁走明日程入謝帥知之始大敬服且問故程曰下營時有怪風占必有偷營者故移營以避之一軍皆稱

神明闔帥屯兵大山程兵寡傍溪結營賊酋朱必森率兵隔溪過爲大言軍聞色變程下馬拜衆軍使死中求活諸軍奮諾無何賊下溪水挑戰程令諸軍跣足迎之半渡賊鞋襪汙水中拔足不能出擊之大敗追奔數十里初程率兵赴鉛山圍木柵作城以拒賊賊數挑戰軍士郭阿保善舞牌劉蠻驢善使鐵叉二人相議曰我與若素號驍勇今不與戰是怯也郭先跳出木城有騎賊從而斧之郭以牌迎斧乘勢伏地以進劉舞叉前支其斧郭則滾牌起斬其馬足賊墮劉刺之斃乘勢進攻賊大敗程軍牌皆黑綠色賊望見黑牌軍輒驚曰彭家軍來矣急遁去遂進攻前後洋兩寨及鵝峯山大竹口嚴家島黃金井連戰皆捷禽首賊三招撫脅從九月

凱還景泰元年賊葉宗留復叛率兵往溫州征之於永康及游義沙灘大戰最多搜麗水山哨白姆沿滄攻麻陽龍潭破之二年天井背大戰追至紫草菴周寮寨禽首賊五三年兵部歷叙程戰功爲當路所抑僅升指揮同知功大而賞薄論者至今惜之

兩浙名賢錄

王業字時泰世襲仁和衛副千戶年十六襲職京師適車駕北征例當扈從業在軍中動循紀律勇略過人旣凱還督江西吉安屯田事一軍政務咸咨之梅花洞寇作業往平之永豐大盤山賊首曾子良聚衆刦殺郡守陳本深謀於業業奮然曰兵固不敢擅調然民患之急如此可坐視乎古有先發後聞者卽日選精兵二百餘人倍道以行或諷其急業曰被賊烏合若少緩則有備猝至逼

其營壘一鼓勝之捷聞升本所正千戶閩浙寇起遣大將甯陽侯往討之吉安軍當調業統以往從都督劉某殺丁公崖賊大軍潰而業軍獨全因歎曰吾不得用其智而徒制於人上不能爲朝廷殺賊下不能爲生民除害何以爲人臣遂以鬱憤卒業爲人輕財好義撫馭士卒嚴而有恩臨陣勇氣勃發目光如電橫戈而往前

無堅敵有古名將風

兩浙名賢錄

彭信字中孚仁和人景泰二年進士擢山東道御史巡歷紫荆諸關邊烽無警巡按廣東時嶺南未靖武將專征頗易信儒生及出師誓衆信爲帥指陳方略揆度事機切中肯綮卒之殄滅夷獠兵無挫衄信功爲多俘奏帥以彼所得賞讓信信曰吾文士也自有

階奚以武爲議者偉其功而多其不伐改貴州道巡按陝西歲滿
且代藩臣交章請留以信治關右鋤強植弱威惠並行得憲臣體
上從之留信再替復命巡按河南秩滿復留者再成化初擢順天
府丞以疾卒於官年五十二

兩浙名
賢錄

崔端字惟正海甯指揮僉事偉軀幹多膂力精騎射景泰間倭入
貢還所過求索至攘奪手刃人浙藩檄端防護端耀兵戢旅臨之
以威倭酋帖服無何處婺山民相扇弗靖都督徐恭統兵勦之聞
端才櫟爲前鋒端率勁兵搗其巢生禽賊首陶得禮上功幕府進
指揮同知備倭把總分守浙東端感激自奮水陸之行無一日休
而勞頓困憊疽發於背疾革大呼曰大丈夫不以馬革裹屍竟死

于牀第間乎言畢而逝

兩浙名賢錄

蔣琳字廷振錢塘人宣德間以父驥任授兵部職方司主事升車駕司郎中從尙書王驥西征甘涼南踰川隴屢有戰功擢右通政景泰四年進左副都御史巡撫貴州清強鷙銳號令精明藩臬大吏每廷謁不敢仰視草塘夷叛官軍屢挫琳至計須獮薙而總兵以下難之琳乃獎率士卒親履行陣爲諸將先由是將吏用命戰氣自倍直抵巢穴禽斬無算寇平璽書褒嘉諸苗斂畏以持法嚴急爲怨家所搆坐于謙黨論死

成化志貴州通志

朱貞字惟正錢塘人祖絀有學行爲黔國公沐英所重請於朝廷爲塾師改授學錄始家金陵父皞以家學嗣居師席貞博通經術

天順元年進士除知磁州有異政改鄧州以憂去起復升南京刑部郎中擢四川布政司參議奉勅總督松潘等處糧儲舉措以便民爲務撫禦有方剽掠遂息黑虎寨恃險不服乃與總兵等官密謀剿捕四境以安事聞賞與將埒遽以及年疏乞骸骨歸軍民攀送搢紳供張爲別旣歸葺田廬爲怡老計暇則與林下士大夫爲

眞率會優游十五年卒年七十七

兩浙名賢錄

盛德字大本於潛人貢入太學校南城兵馬司副遷鎮江府通判時海寇王艮僭號崇明勢猖獗臺司有修隙於德者命領前隊往剿德毅然曰臨難而避非忠也遂鼓衆乘風夜抵賊舟艮驚以爲神赴水遁去衆亂遂殲之隨撫其降卒二人爲向導直搗其巢生

禽良以歸時大帥湯震駐師四十里外聞報揚帆遽至盡攘其功

德僅獲賞宴加級尋以疾致仕歸

於潛縣志

沈銳字文進仁和人成化五年進士授刑部主事進員外獄無留滯升江西按察司僉事聽讞明允擊服豪右貪墨吏悉解綬去尤孳孳以興學化民爲務修白鹿洞書院講道不輟轉廣東僉事瀧水後山賊起勢猖獗銳設方略與賊數十戰輒勝乃親率徧師搗其巢俘獲甚衆平民脅從者皆爲昭雪全活千餘人復改江西僉事宏治十八年升廣西按察使正德元年進廣東左布政尋升應天府尹南京刑部右侍郎會劉瑾用事銳上疏極言時政不報遂乞歸瑾惡其忤已摘往事中傷之矯旨奪職逮問瑾誅乃復官旋

進階通議大夫銳方嚴寡合清介絕俗嘉靖初卒年七十六

浙江通志

江西通志

洪鍾字宣之錢塘人成化十一年進士授刑部主事升員外郎中
值江西福建流賊甫定奉命安輯還言福建武平上杭清流永定
江西安遠龍南及廣東程鄉皆流移混雜習鬪爭易亂難治宜令
有司立鄉社學教之詩書禮讓潛化奸宄時以爲知本之論升江
西按察副使宏治初進四川按察使繼屈銳後獄無留繫民歌之
曰洪不支鍋屈不解擔以其迅決不妨民業也由是豪右屏息馬
湖土知府安鼇恣淫虐土人怨刺骨僉事曲銳請巡按御史張鸞
按治鍾贊決捕鼇送京師置極刑安氏自唐以來世有馬湖至是